

KERWEREDD 1983

Straußbuwe !!!!

Endlich, endlich iss ess mol widder soweit,
mer sin widder fer die Kerb bereid.

Uff eier Hoffe unn Erwarte
duun mer das Jor mol orrdendlich die Stimmbänner schwade.

Mer mache eich nur Fräd unn gar kä Schann,
die Närremorer Kerb iss wärrer ufferstann.

Drumm gris ich eich, wie nerr do stee,
ob met kerze orrer lange Bä.

A die Beglobde unn die Dolle
sowie die Nichterne unn die Volle.

Net se fegesse die Mozzer unn die die maule,
awer a die Fleisiche unn die Faule.

Ehr hann eisch allega do hergeschaffd,
de äh met veel - unn de anner met wennischer Kraf.

Memm Wedder simmer zum Glick gut dro,
ES Telex kaam scheinds beim Petrus gut o.

Isch hoff, ehr hann Verstendniss fer die Redd
unn dun eisch net eire, sunscht vegehd uns die Luscht am feire.

Die Leit, die dass net kenne here,
die solle erscht emol for de eichene Deer kere.

Eer hann gut lache, eer steen net do hoppe,
eer sinn all do unne unn saufe die Schoppe.

Drumm bin ich defor, daß die Musig duut spele,
inn de Zwischezeitd dunn isch do owwe mei Stimmbänner eele.

Eer Musigande, jetzt spele mol flott,
dass die Leit sihe, do wert was gebotd.

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Lied: Wir machen durch bis morgen früh.....

Straußbuwe!!!!

Es ledschde Jor beim Felsefesd
do hads enner gans schä bes vewischt.

Bei demm Fesd gebds fel Addragtione,
wo sichs Mettmache dut anoch lohne.

Enns dodefunn is es Wasserfaare,
do streeme die Leit vunn üwwerall her inn Schare.

Doch ess qebd nett blos schnelle Farer unn Schuppkärschtrimmer,
es gebt bei der Sach an noch vollgesoffene Schwimmer.

Wie de Weddbewerb so schä am Laafe war,
do fangt doch so ä Ochs o, es Wasser in de Säkk se draa.

Er roppt elegand inss Wasserbasseng,
sei Fraa hoqqt dabei unn dätt smm es liebschd gewwe sei Feng.

No e paar Runde hat er genunk,
die Fraa un die nasse Klamodde hann emm gans schä gestunk.

Wie er dann häm is zum Hossedausch,
hatter uff emol gemärkt sei Rausch.

E falscher Dritt, a kürzer Schrei,
do wars mett emm ähne Bäh vorbei.

Die Musik spelt demm Schwimmer zu Eehr:
“Oh, wie iss bloß dass Lafe im volle Kapp doch so schwer!?”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Lied: Es gibt kein Bier auf Hawai.....

Straußbuwe!!!!

Meer hann bei uns e grosses Schlizoor,
das iss de greescht Wertschaftsgänger funn Nerremoor.

Doch met de Zeid hats emm bei unns nimmie gelangt,
do hatter anoch in annere Qrtschafde getankt.

Seines Zeichens iss er Bäcker
unn kennt a alle Biergeschmäcker.

In de Reischbach bringt er sei Weck am beschde ah,
dodruffhin hanse ne a glei im Radio iwwerdraa.

Do fezelt er sei Story funn vorne bis hinne
unn fangt debei gans schäh oh se spinne.

Die Reischbacher hatter veteidigt wie e Sau
unn die Schrollbacher hatt er voll inn die Pann gehau.

Beim Nolde gefallts em arisch gut,
do tankt er fer dehäm noch neier Mut.

Uff emm Hämeeg iwwerkommt emm dann es Graue,
er denkt sich, kenntscht jo doch noch beim Alfred rinnschaue.

A sunnscht is de Paul net ganz ohne,
sunnscht dät er jo net in Nerremohr wohne.

Eehr Musigande speele dem Bäcker gans fair:
“Ach, wenn doch bloß Bier in de Weck drinn wär!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Lied: Nach Hause gehn wir nicht....

Straußbuwe!!!!

Do owwe im scheenen Weenerstaal,
do hammer a e gans besonnerer Fall.

E Bundeswehrsoldad in foller Kluffd
iss meischdens anoch voll der Schuffd.

De Bund, der hadd ne so erfreid,
dass er sich glei veflicht had uff Zeid.

Memm Audo dut er gans schä rase
unn globbt a sunschd ahaufe Frase.

Bei soner nächdlichen Raserei
kaam er a mol in Etschbersch vorbei.

Die Kurf wurd uff ähmol immer steiler,
do wars bassert, er rammt de Peiler.

Er iss dann a noch in de Vorgarde eninngefaar,
de Hausbesizer wollt emm an de Kraa.

De Taunus unn de Vorgarde ware gans schah hinn,
das wärd demm Bersch hoffendlich e Lere sinn.

Straußbuwe!!!!

Damals am Maidanz hatter e gans scheener Dorscht,
gesoff hatter die Schoppe, gefress hatter die Worscht.

Am frije Morje werd die Luft uff emol neweligweiß,
Der Bangert denkt, was iss enn das fer a scheiss.

Do hat so e Penner uff de Feierlescher druffgedrückt
unn imm vollgesoffene Kopp had der Soldad denne ganze Staab verschliqgt.

Er hadd gedenkt, er kennt met dem Dinq lösche sei Brand
unn had dodebei die Gefaar vekannt.

Dodedruff hanssene ins Krankehaus gebracht,
die Ärzd, die hann sich ball dotgelacht.

No e paar Trobbe in die Aue,
wolld der Hund schun wärrer bei die Fraue.

Die Musik spelt dem Schluckspecht Gonzo zu Ehr:
“Es Brandlesche iwverlosse mer besser de Feierweer!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Lied: Heute blau, morgen blau....

Straußbuwe!!!!

Do owwe am Kerchhof hannse e Vereisheisje higestellt,
das koscht unser Gemäh werre a gans schäh Geld.

Ich mäsch emol wisse, wer dass soll bezahle,
meer steen doch sowieso schunn in de rode Zale.

Doch enns hannse vegess bei der gans Planerei,
das Wasser macht jezt schunn e Mordssauerei.

Jezt fange die Partie noch o se streite,
sie wisse net, wo sess Wasser soll hieleide.

Funn morjens bis owens hanse gebuddelt
unn hann dodebei doch gans schäh geschnuddelt.

Ess hadd jo misse so e fundamendales Gebeide her,
als obb de Dote e klä Heisje net genauso recht wär.

E jeder Bajemachter hat bis jezt sei Denkmal gesetzt,
de Gregor hats sichs grad unne ans Haus hiegesetzt.

Ess wärd sich zeiche, ob de Bau sich rendeert,
bis jezt hat sich emol noch kä Doter beschwert.

Eehr MusikandE spele dene Planer gans sacht:
“Was hanner eich dodebei blos gedacht!?”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Lied: "Wer soll das bezahlen!?"

Straußbuwe!!!!

Unser Wärt, dass iss e grosses Schenie,
er fällt als vor de Asbachflasch uff die Knie.

Inn emm Sprudelgläsje iss jo nett feel,
das losst der laafe in emm Ruck durch die Kehl.

A Stunn, awwer hegschtens zwä,
da waggele demm Schluckspecht doch die Bäh.

Er schafft sich dann hoch inn sei Gemach,
dort schlofter dann meischdens bis de nägschte Daach.

De nägschte Morje steit er uff aus seinem Bedd,
kaum iss er in de Wätschaft, griet die Madamm schunn eer Fedd.

Doch der hats jezt emol gelangt,
die had beim Hannes abgedankt.

Da kaam ea ihr gleich in de Sinn,
ich geh mol bei de Wendelin.

Unn wie die Zwä do mache erum,
do kommts unserm Wärt uff emol zu dumm.

Er saat sich, die do zwä komme mer nimmi inns Haus,
sunsch schmeiß isch se mit meine eichene Hänn enaus.

Unn wie er dann werklich zu wiede ofange woll,
do hat ne die Bolizei dann dabber abgeholt.

Gebrennt hats dann anoch, gequalmt unn gestunk,
doch de Hannes hat wider sei Asbach gedrunck.

Die Musik speelt dem Hannes gans galant:

“Wer hat denn nur den Schnaps für mich gebrannt?!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Lied: Schnaps, das war sein leztes Wort...

Straußbuwe!!!!

Doo owwe in de Schulstroos, do wont e Bersch,
das iss de Wendelin Schelleberg.

Der steet dehemm bei de Mamme gans schä unnerm Schlappe,
drum dut er a jede Owend zum Hannes nunnertappe.

Doletzt hat er jo emol gans schä enner gezischt unn hat sich dann glei in a Krach ninngemischt.

Do kamms, wies komme muß, er hat eni grit,
im Krankehaus hansem dann später die Auebraue verneht.

Der Krankeflegler hat ne gefroot: "Willst du e Spritz?",
do saagt der Junggesell: "Ich glaab, das iss e Witz!"

Higebrung wer iss er fun zwä junge Fraue,
als er heemwollt, konnt er seine Aue nimmi traue.

Die Mäd warn nimmi doo, er denkt sich was sinn das fer Gäse,
doo hat ne doch tatsächlich e Taxi misse heemscheese.

Doch eer Leit jetzt here her, ess gebt a neii Kunn.
Der Bangert hat endlich mol e gescheiti Arwet gefunn.

Doo iwwe beim Karlsche, doo helft er beim Baue,
hoffentlich tut er am Schluss net das Heisje vesaue.

Die Musik speelt dem Junggesell voller Rasse:
"Endlich kann ich mei eichenen Geld vepassel!"

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Straußbuwe!!!!

Meer hann bei uns im Ort e fleisische, tichtigsche unn qeschwäzische Frau,
die dut a heit zu da noch die Zeitung mem Rad austraa.

Was die schafft, dassiss äfach klasse,
das iss e Fraa funn besonnnerer Rasse.

Morjens butzt se, mittags dut se koche,
kenner dut se lowe, a net eer alter Knoche.

Dann dut se nähe, stoppe unn a flicke
Unn de Ald dut se anoch inkaafe schicke.

Das Inkaafe iss fer die gud Fraa gans wichtisch,
do isse bei de Gerber Angnes richtisch.

Do duun se vezele unn a lache,
üwwerbringe sich debei die neischde Sache.

Deno geht se bei de Otto in die Metz,
halt dort anoch e klä Geschwätz.

Als se dehäm auspackt unn es Geld zehle will,
steht eer uff emol es Herz qans still.

Sie hat gemennt, sie hat's Partmanä felor
und rennt gans schnell zur Angnes vor.

Do wars net, was sollste blos du,
die Angscht vorm Alte loßt eer kä Ruh.

Dann rennts se nochemo in die Metz,
doch nix wars, umsonst war die Hetz.

Als se dann beim Schnitzelesse war,
ein großes Wunder dann geschah.

Es Julia setzt sich, es denkt es flippt aus,
aus em Deller fischt se es Portmonä eraus.

Eer Musigande speele dem Julia voller Rasse:
“Net so vel vezele, dann stimmt a die Kasse!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Lied: Ja mir san mim Radl da...

Straußbuwe!!!!

Doo iwwe inn Scheeneberch dut enner woone,
denne dumer das Jor in de Redd anet veschoone.

Der hat sich doo e dick Ding geleischt,
das hät fer e gansi Kerweredd gereicht.

Inn Ludwichshaafe iss er erumgestärzt unn wollt sich gar nix schenke,
Am nächste Morje konnt der Bangert an gar nix me denke.

Doo werds emm gans anersch in seinem Suff
unn steit fer se schlofe uff a Audodach nuff.

Doo grien ne uffemol zwä Bolizishte se greife,
die wollte met seim Schloßplatz fare uff Streife.

Sie hannne debei unsanft geweckt
unn glei in die Ausnichterungszell gesteckt.

Am nechste Morje beim Veher
vezeelt er als, das er inn Lautre wär.

Die freindliche Bolizishte hannsem vezeelt, waser ogestellt hat,
Do war der Hund awwer gans schä platt.

Gell, Jürgen, ess nechste mol bascht de uff, wo de bischt,
sunscht erwischt dich uffemol wärer so a Bolizischt.

Die Musik spelt der a gans lescheer:
“Ess nächste mol bleib sche in de Näh, do iss ess heemkumme net so schwer!”

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!

Straußbuwe!!!!

Ich merke allewei, die Glieder wern schwer,
ach wenn doch emol das veele Vezeele net wär.

Ich men allemol, es langt fer das Jor,
Isch han doch heut noch was anderes vor.

Isch bedank mich a Schee fer eier Geduld
unn hoff, er gewo mir an dem Maleur net also veel Schuld.

Jetzt losse eich net noch lang uffhalle
Unn dun eich mol glei was se Tringe kralle.

Doch bevor mer so rischtisch die Kerb genieße,
will isch doch erscht noch unser Schdrauß mit Wei begieße.

Strauß mit Wein begieße! Straußbuwe!!!!
Unser Baam soll lewe hoch!!!!

Du sollschd do es ganse Jor iwwer henke,
dass die Leit a immer an die Neremorer Kerb dun denke.

Straußbuwe!!!!

So, eer brauche gar ke Hoffnung se hege,
daß ich noch weiter mei Maul tun bewege.

Ich stei jetzt do runner, so lang wie ich bin,
und grüß eich nochmal all wie ner do sin!

Isch sä eich jezt tschiß un uff widdersehn
unn feire mer blos noch die Kerb recht scheen.

Unn wenn ich a jetzt do runner kumm,
Vergesse net - die Kerb iss noch lang net e rumm.

Straußbuwe !!!!

Wem iss die Kerb !!!!

Die Neeremorer Kerb soll lewe !!!!

Unn noch emol !!!!